

**ACCION★21**  
**PLAN DI**  
**PARTIDO**  
**2025 - 2029**

**#BanBibaMiho**  
**WWW.ACCION21.COM**

# CONTENIDO

Baha costo di bida	5
Elimina BBO/BAZV/BAVP, invoerrechten, tourism levy, environmental levy, car rental tax, gaming tax, deviezen provisie y transfer tax	5
Reverse Charge BTW	6
Elimina Inkomstenbelasting	6
Ahusta Capital Gains Tax	6
Ahusta Winstbleasting - 'Corporate Income Tax'	6
Introduci sistema di impuesto territorial	6
Automatisacion y digitalisacion di servicio di impuesto	7
Elimina impuesto riba number di auto - 'Wegenbelasting'	7
Liberalisa uso di moneda	7
Reforma Banco Central di Aruba	7
Sistema di pago local	8
Introduci Aruba Financial Services Authority (AFSA)	8
Desaroya un mercado capital local - Aruba Stock Exchange	8
Aproba Rijkswet - Reduci gastonan di interes	9
Repriorisa gastonan di Gobierno	9
Reduci gastonan di Gobierno	9
Absorba debe di estudiante	10
Cuentanan anual controla	10
Acceso lihe na sistema financiero	10
Tax Holiday pa entrepreneurs nobo	11
Publica presupuesto completo	11
Sigura acceso na sistemanan di pago internacional	11

**#BanBibaMiho**  
**WWW.ACCION21.COM**

***MINISTERIO DI  
FINANSAS***

## BAHA COSTO DI BIDA

### Rediseña nos sistema di impuesto

Costo di bida ta keda e reto mas grandi enfrentando e proximo gobierno. Nos sistema di impuesto acumulativo ta hisa costo innecesariamente. Mirando cu nos ta importa practicamente casi tur loke ta wordo consumi localmente, nos residentenan ta paga gastonan exageradamente halto.

Ehempel: un producto di balor AWG 100,- ta ser importa

AWG 100,-	Balor di producto
AWG 4,90	CIF (Cost, Insurance, Freight)- promedio 4,9%
AWG 1,36	1,3% Impuesto riba divisa pa compra y importa e producto
AWG 12,59	Invoerrechten (promedio 12%)
AWG 7,34	BBO na frontera 7%
AWG 8,32	BBO 7%
AWG 134,51	Costo pa consumidor EXCLUYENDO margen di ganashi di importado y bendedor

- Pa un comerciante importado cumpra un producto y transporte pa Aruba e mester cambia su florin pa dollar of euro mirando cu no por paga cu florin den mercado internacional. Banco Central di Aruba ta impone un impuesto di 1,3% riba cambio di divisa agregando AWG 1,36 di gasto;
- Ora e producto yega Aruba, Douane ta cobra invoerrechten riba e balor

di producto plus CIF (cost, insurance, freight). Averahe mudial di CIF ta estima na 4,9% na 2022 y e tarifa promedio di invoerrechten ta 12% agregando AWG 12,59 di gasto;

- Douane ta cobra BBO na frontera di 7% tambe riba e balor di producto plus CIF agregando AWG 7,34 di gasto;
- E importado ta bende e producto cu bendedor (retailers) cu despues ta bende e producto cu consumidor cu ta paga BBO di 7% agregando AWG 8,32 di gasto;
- E consumidor ta paga casi 35% na impuesto acumulativo sin conta margen di ganashi di e importado, bendedor, gastonan bancario pa transferencia internacional etc. cu ta hisa e prijs mas ainda.

### ELIMINA BBO/BAZV/BAVP, INVOERRECHTEN, TOURISM LEVY, ENVIRONMENTAL LEVY, CAR RENTAL TAX, GAMING TAX, DEVIEZEN PROVISIE, TRANSFER TAX

Un sistema indirecto di impuesto ta mas robusto paso gran parti di entrada di gobierno lo yega door di actividad economico manera consumo cu ta menos vulnerabel na shock externo, contrario na ganashinan di compania. ACCION21 lo simplifica y rediseña nos sistema di impuesto y introduci un BTW riba un base amplio segun recomendacionnan di IMF y CAFT. BTW no ta un impuesto acumulativo dus e no ta ocasiona un inflacion di prijs mes

halto cu nos sistema actual. E ta mehora compliance y reduci tamaño di nos economía informal cu actualmente ta calcula na mas cu 1,3 biyon anualmente. Enseñansa, servicionan medico, actividadnan deportivo, servicionan financiero y seguro, cuidado di mucha, servicio di cuidado y cuidado na cas, energia renovabel y productonan asocia y fundraising lo ta exclui di BTW.

### REVERSE CHARGE BTW

Pa sigura cu rediseñamento di nos sistema di impuesto ta husto pa tur competido, lo introduci un reverse charge BTW pa servicionan di compania internacional. No por permiti cu servicionan di p.e. accounting, consulting of legal internacional ta mas competitivo paso nan no mester cobra BTW, contrario na esnan local. Asina nos ta sigura un level playing field pa negoshi local cu ta provee servicio.

### ELIMINA INKOMSTENBELASTING

Nos lo elimina inkomstenbelasting cu no ta produci mucho den caha di gobierno y ta un impuesto ineficiente pa colecta. Actualmente mester procesa mas cu 40.000 aangifte pa recauda menos cu diescinco (15) milyon pa año.

### AHUSTA CAPITAL GAINS TAX

Nos lo ahusta e base di capital gains tax pa inclui e.o. propiedad y ahusta e tarifa na entre dies (10) – diescinco (15) por ciento. Residencia principal cu e propietario mantiene pa mas cu cinco año lo ta exonera di capital gains tax. Compliance riba capital gains tax lo ta mas facil mirando cu tur benta di propiedad ta pasa via notario.

### AHUSTA WINSTBELASTING - 'CORPORATE INCOME TAX'

Nos vision ta pa un economia dinamico y resiliente cu ta contribui na caha di gobierno mas door di impuesto indirecto. Actualmente corporate income tax ta na bintidos (22) por ciento y nos lo kier studia posibilidad pa inicia un reduccion gradual te cu diescinco (15) por ciento pa haci nos economia mas competitivo den futuro. Ta reconoce cu compliance ta keda un reto y nos lo studia tambe reemplasa corporate income tax completamente y inclui'e den BTW como parti di rediseñamento di nos sistema di impuesto.

### INTRODUCI SISTEMA DI IMPUESTO TERRITORIAL

Nos sistema di impuesto actual tin algun di e tarifanan mas halto na mundo y apesar di ta hopi progresivo no a logra un distribuicion mas husto di entrada.

Turismo ta representa gran parti di nos economia y nan no ta contribui nan fair share na impuesto. ACCION21 lo introduci un sistema di impuesto territorial cu lo cobra impuesto riba tur ganashi genera na pais Aruba. Esaki lo facilita Servicio di Impuesto pa unicamente controla entradanan genera localmente y amplia nos base di impuesto mientras nos ta haci nos economia uno mas competitivo.

### AUTOMATISACION Y DIGITALISACION DI SERVICIO DI IMPUESTO

Nos lo sigui amplia digitalisacion di nos servicio di impuesto y introduci automatizacion caminda posibel pa reduci tempo di procesamento y otro tareanan.

### ELIMINA IMPUESTO RIBA NUMBER DI AUTO – ‘WEGENBELASTING’

Impuesto riba number di auto ta ineficiente pa colecta y ta rekeri hopi esfuerso innecesario di nos ciudadanonan y servicio di impuesto. Fuera di esey, e ta un flat fee cu no ta tene cuenta cu uso di auto y caretera. Nos kier elimina impuesto riba number di auto y reemplasa e entrada cu un aumento chikito di algun cen na accijns. Esaki ta mas husto paso mas un persona haci uso di su auto, mas e lo paga den accijns riba gasolin, tambe esaki lo curasha transicion pa auto electrico.

### LIBERALISA USO DI MONEDA

Un moneda tin tres funcion: mecanismo di cambio, unidad di balor y garantia di spaar. Nos kier liberalisa e mercado y permiti nos ciudadano y empresanan usa e moneda di nan escogencia pa uso diario. Nos mercado financiero actual ta desfuncional cu interes riba bononan di pais Aruba mas halto cu interes di un prestamo comercial na banco. Como un partido liberal progresivo nos kier liberalisa e mercado, empresanan cu ta haci mas negoshi cu Merca lo prefera di conduci comerci den dollar y mester tine libertad pa haci esey den tur transaccion. Ciudadanonan cu yiu ta studia na Hulanda kisas lo prefera spaar den euro y mester tin e libertad pa haci esey. E falta di un mercado internacional pa florin Arubano ta limita no unicamente acceso na plataformanan di pago pero tambe acceso na productonan financiero. Nos no kier aboli florin Arubano pero si nos kier duna tur persona y negoshi e oportunidad pa haci transaccion den e moneda di nan gusto, ta premira cu gobierno di Aruba lo sigui opera den florin.

### REFORMA BANCO CENTRAL DI ARUBA

#### Back to Basics

Eliminacion di deviezen provisie lo rekeri un reorganizacion di Banco Central di Aruba, actualmente nos banco central ta extremadamente caro pa opera y a desvia di su metanan principal. Banco

central su rol esencial ta inclui regula banconan y industria financiero na Aruba y sigura nan estabilidad y resiliencia. Maneho monetario, emiti notanan bancario, fia otro banconan placa 'lender of last resort', sigura estabilidad di e florin y controla suministro di placa ta otro tareanan di Banco Central di Aruba. Ta importante pa e instituto mantene su independencia pero nos lo kier mira un estudio pa identifica ki tareanan ta esencial pa Banco Central mantene y ki tareanan lo ta miho sirbi pa otro instituto(nan). Introduccion di limite di termino di diesdos (12) aña pa director y directiva di Banco Central ta algo cu nos lo kier introduci y tambe sigura cu tin representacion adecua di bankeronan cu experiencia den e industria luga di solamente academico y hurista.

## SISTEMA DI PAGO LOCAL

### **E regulador NO por ta operador**

Banco Central di Aruba como regulador di industria financiero NO por tambe ta un operador manera ta e caso actualmente cu I-Pago. Ta importante pa Banco Central pasa e sistema di I-Pago pa un otro instancia pa elimina e conflicto di interes actual. E sistema di I-Pago por ser desaroya pa permiti transaccion directo entre negoshi y eventualmente inclui tur individuo y asina ofrece un sistema di pago local como alternativa na esnan internacional. Nos lo kier mira un revision di tarifanan cu actualmente ta entre 10-15 cen pa transferencia, esaki ta un bon

fuerce di entrada pa Banco Central pero e ta añadi gastonan innecesariamente halto.

## INTRODUCI ARUBA FINANCIAL SERVICES AUTHORITY (AFSA)

Nos lo kier introduci un instancia nobo, independientemente financia, pa regula industria di servicionan financiero. Aruba Financial Services Authority (AFSA) lo ta encarga cu traha y emiti norma y standardnan. Haciendo uso di dato y tecnologia lo aplica regulacion proporcional na riesgo tumando na cuenta tamaño, complehidad y impacto potencial riba diferente tipo di consumo. Actualmente nos tin regulacion desproporcional na riesgo cu ta obstaculisa nos economia y detene crecemento economico.

## DESAROYA UN MERCADO CAPITAL LOCAL – ARUBA STOCK EXCHANGE

Siguendo ehempel di Bermuda y Cayman Islands nos kier desaroya un mercado capital local, Aruba Stock Exchange, cu lo ta miembro di World Federation of Exchanges (WEF) y International Organizations of Securities Commissions (IOSCO). Aruba Stock Exchange lo bira un plataforma eficiente pa mercadonan global y nos lo desaroya mas riba e posibilidadnan den nos plannan pa Ministerio di Economia, Infraestructura y Medio Ambiente.



## APROBA RIJKSWET – REDUCI GASTONAN DI INTERES

Actualmente tin un acuerdo gubernamental entre Aruba y Hulanda pa introduci un rijkswet (ley di Reino) pa supervision financiero. E rijkswet lo mester ser aproba pa 1 mei 2025 y una bes esey tuma luga, interes riba nos prestamo cu Hulanda di 915,5 miyon lo baha di 5,1% te cu 3,4%. Si Aruba no aproba e rijkswet interes riba nos prestamo lo subi bek te 6,9%. Gastonan di interes ta representa riba 300 miyon florin anualmente pa pais Aruba, excluyendo pagonan riba proyectonan PPP cu ta rond di 80 miyon pa aña. Aruba su debe di AWG 5,6 biyon ta financia entre 5-6,5% y introduciendo un rijkswet nos por reduci nos gastonan di interes substancialmente, scapando mas cu 150 miyon florin pa aña. Hulanda a muestra disposicion pa refinancia debe di Aruba cu ta madura anualmente (usualmente entre AWG 300-500 miyon) na su nivel di interes cu lo libera fondo pa otro uso. Si Aruba a drenta e rijkswet pa supervision financiero na 2010 y por a fia placa na mesun interes cu Corsou y Sint Maarten, nos lo a scapa e pagado di impuesto Arubano riba 3,2 biyon florin den ultimo 14 aña. Tanten Hulanda ta provee un nivel di interes mas competitivo cu nos por haya riba mercado internacional, acepta e rijkswet pa supervision financiero ta den nos interes nacional. Tur e normanan den e rijkswet ya caba ta hancra den e LAft, landsverordening Aruba financieel toezicht, dus no por papia di entrega nos autonomia paso parlamento a aproba caba unanimamente.

## REPRIORISAGASTONANDIGOBIERNO

### Hisa inversion den enseñansa te cu 6% di GDP

Nos kier mira gobierno repriorisa gastonan, actualmente ta gasta rond di 4,6% di GDP riba enseñansa y recomendacion internacional ta pa gasta un minimo di 6%. Nos, ACCION21 lo hisa e suma cu pais Aruba ta inverti den enseñansa te cu 6% durante e proximo periodo di gobernacion. Esaki lo genera rond di 100 miyon florin extra pa enseñansa.

### Hisa inversion den salubridad publico te cu 10% di GDP

Actualmente pais Aruba ta gastando rond di 8,4% di GDP riba salubridad y nos lo kier mira e suma subi te cu 10% durante e proximo periodo di gobernacion. ACCION21 lo repriorisa gasto di gobierno pa aloca mas fondo pa salubridad publico incluyendo cuida di nos adulto mayor. Esaki lo genera rond di 112 miyon florin extra pa salubridad y cuida cronico.

## REDUCI GASTONAN DI GOBIERNO

Presupuesto 2023 tabata tin un total di 1,508 biyon den gastonan di gobierno. Presupuesto 2025 tin un total di 1,726 biyon den gastonan di gobierno. E aumento constante y structural den gastonan di gobierno no por sigui si nos kier evita mas medida. Gobierno di Aruba ta mas cu 60% mas caro pa administra cu Sint Maarten despues di ahusta pa diferencia den tamaño y Aruba su nivelnan di debe mas halto. Aruba tin mas cu 2.000

ambtenaar mas cu pais Corsou aunke nan ta mas grandi den poblacion y tamaño. Mester frena e aumento den gastonan di gobierno y cuminsa reduci nan te cu 1,500 biyon mientras Aruba su debe ta riba 50% pa GDP. ACCION 21 lo reduci gastonan total riba presupuesto di pais Aruba pa 2,5% anualmente durante e proximo cuatro año. Un reduccion di 10% di gastonan di gobierno lo scapa e pagado di impuesto mas cu 170 miyon florin pa año.

### ABSORBA DEBE DI STUDIANTE

Exito di nos pais den futuro ta depende riba nos capacidad di convence nos studiantenan bolbe. Nos mester aresta e brain drain cu Aruba ta sufriendo den ultimo añanan a causa di falta di progreso profesional, salarionan mas abao, un sector publico ineficiente y domina pa patronahe politico etc. Nos pais ta keda un small island developing states (SIDS) dus dificilmente nos por competi a base di compensacion cu paisnan y ciudadnan grandi y avansa. Siguiendo modelo di Singapore, ACCION21 kier desaroya un maneho cu gobierno ta asumi pago di debenan escolar di estudiante si nan bolbe Aruba dentro di dos año di graduacion y keda residencia na Aruba pa por lo menos cinco año. Ta premira cu durante e periodo aki ta probabel cu e profesionalnan hoben lo namora, casa y haya yiu. Door di inverti mas den enseñansa nos kier percira cu bon scolnan, lasonan familiar y vivienda accesibel lo atrae e parehanan hoben keda Aruba y forma nan bida aki nan. Nos

mester ta innovativo pa sigura cu nos talentonan ta bolbe y keda, un sistema di impuesto rediseña tambe lo haci'e mas atractivo financieramente.

### CUENTANAN ANUAL CONTROLA

Actualmente tin un tardansa inaceptabel den cuentanan anual, jaarrekening, di pais Aruba. Minister di Finansas a kibra tur compromiso di entrega y ultimo ciclo presupuestario cu a cera ta di año 2018. Presupuesto ta representa gobierno su plan y unicamente cu un cuenta anual parlamento por controla con gobierno a gasta e placa den presupuesto. Un cuenta anual ta ser controla pa Algemene Rekenkamer y despues Centrale Accountantsdienst(CAD)mester controla pa mira si e ta acopla na administracion di pais Aruba. Te ainda ningun cuenta anual di pais Aruba a ser controla pa un accountantskantoor externo, algo cu mester sosode anualmente. Proximo Minister di Finansas mester structura entregamento di cuenta anual na tempo, juni di tur año y percira cu nan ta controla pa un accountantskantoor externo.

### ACCESO LIHE NA SISTEMA FINANCIERO

Banco Central di Aruba a presenta un ley cu ta garantisa acceso na un cuenta basico pa tur individuo y compania legalmente estableci na Aruba. Mester sigura cu personanan stranhero cu un propiedad na Aruba tambe tin acceso facil na nos sistema financiero. Garantisa

acceso ta e prome paso, tambe mester reduci e tempo cu ta dura habri un cuenta, specialmente pa negoshi. Actualmente comerciante y entrepreneurs ta warda seis luna of mas pa habri un cuenta comercial. Nos kier introduci regulacion cu ta reduci esaki te cu dos siman of menos door di ofrece un cuenta condicional cu limite mientras proceso di screening ta completa. Awor aki mucho persona y compania ta wordo excluidi di nos sistema financiero obligando nan di opera den sector informal. Esey ta un peliger mas grandi no solamente pa integridad di nos sistema financiero pero tambe ta dificulta servicio di impuesto di controla.

### TAX HOLIDAY PA ENTREPRENEURS NOBO

Nos kier curasha entrepreneurship y kier ofrece incentivo fiscal pa personanan habriendo nan prome negoshi. ACCION21 lo brinda tur entrepreneur nobo un tax holiday (periodo liber di impuesto) di dos aña pa yuda nan ta exitoso. Comienso di un negoshi nobo hopi biaha ta e periodo mas critico y actualmente servicio di impuesto ta cuminsa cobra prome cu nan a cuminsa gana placa, poniendo hopi presion riba nan capital limita. Nos kier duna nan un espacio pa nan por crea un fundeshi solido y asina gobierno por contribui na nan exito. Tambe nos kier inclui entrepreneurship den nos sistema di enseñansa pa cultiva un mindset emprendedo den nos hobennan.

### PUBLICA PRESUPUESTO COMPLETO

Pueblo tin e derecho di por controla con gobierno ta gasta su placa. ACCION21 ta kere den publica e totalidad di gobierno su gastonan riba website di gobierno pa tur ciudadano por controla con cada cen di nan placa ta ser gasta. Un ministerio di gobierno saliente a cuminsa pero e no ta hancra den ley ni tampoco riba plataforma di gobierno dus su continuidad no ta sigura. Hunto cu hancra e LIM landsverordening instelling ministeries den constitucion pa facilita comparacion, publicacion di presupuesto di pais Aruba pa ministerio y departamento lo brinda miho control no unicamente pa parlamento pero tambe pueblo en general.

### SIGURA ACCESO NA SISTEMANAN DI PAGO INTERNACIONAL

Actualmente acceso na sistemanan pa ricibi pagonan internacional pa hopi profesional ta mucho dificil y caro. Plataformanan manera paypal no ta opera na Aruba, liberalisacion di uso di moneda lo haci'e mas facil pa plataformanan di pago y industria di fintech por opera na Aruba. Esaki lo crea oportunidadnan nobo pa nos talentonan local opera y ofrece servicio den mercado internacional.

**ACCION★21**  
**PLAN DI**  
**PARTIDO**  
**2025 - 2029**

**#BanBibaMiho**  
**WWW.ACCION21.COM**